

Cincuenta aniversario celebracion Aña di la Reina

ORANJESTAD- Dia 30 di april proximo ta recorda cu cincuenta aña pasa a cuminsa cu e celebracion di Aña di La Reina ariba 30 di april.

E organisacion Oranje Vereniging Aruba a keda funda na februari 1948 cu e meta pa coordina e actividadnan relaciona cu e hubileo di oro di Reina Wilhelmina na augustus 1948 y na mesun momento pa e inauguracion di reinado di Reina Juliana na september 1948.

Ora cu Reina Beatrix a tuma e reinado over di su mama na 1980, el a dicidi cu Aña di La Reina ta keda dia 30 di april, fecha di cumpleaños di su mama Princesa Juliana den feliz memoria.

Na principio Oranje Vereniging tabata haya ayudo di fondonan di Hulanda pa coordina e celebracion na Aruba y despues tambe di parti di Gobierno di Aruba.

E celebracion tabata consisti di dos parti esta e parti ceremonial y e parti di celebracion den pueblo. E celebracion den pueblo ta conoci pa e weganan popular manera sutamento cu cusinchi,

subi pal'i seba, hisamento di flie, coremento den saco, competencia di boto miniatura, coremento tras di porco etc. Te cu awe ainda e celebracion den barionan ta tuma luga y ta momentonan cu amigo y famia ta topa otro pa pasa ratonan agradabel.

Den añanan ochenta a surgi e idea pa bini cu un premio pa stimula e trabou pa hobennan ariba diferente tereno manera deporte, cultura, tereno social etc. A introduci e copa Gobernador Ben Leito, e

tempo ey gobernador di Antiyas Hulandes di cual Aruba tambe tabata forma parti.

E copa aki a keda existi na Aruba te na 1992. Tabata e aña cu e prome Gobernador

di Aruba, señor Felipe B. Tromp, a retira y presidente di Oranje Vereniging Aruba e tempo ey señor Jos van der Schoot a acerca señor Tromp pa dedica e copa na su persona.

Pues copa Hubenil

Gobernador Felipe B. Tromp ta un premio pa un hoben of instancia hubenil cu a destaca durante e ultimo aña sea ariba tereno social, cultural, deportivo.

Un organisacion of scol cu

durante henter aña a traha cu proyectonan pa bienestar di formacion di nos hobennan tambe por bini na remarke.

Ultimo dia pa entrega un proposicion ta diahuebs awor 23 di april.